

Omeopatia – trend era tar ils animals

Dieta da bio sin il Plantahof e sin il Strickhof

■ (anr/grc) **Ier è stada la dieta da bio en il Center da furmazion e cussegliazion agricola sin il Plantahof a Landquart. Il tema central da questa dieta è stà l'omeopatia. Ils dus omeopats diplomads Susanne Dachauer-Bardill ed André Ackermann han demonstrà e referì davart quest tema. Ils 12 da december ha la medema dieta lieu sin il Strickhof a Lindau.** Atgnamain sa tracti d'ina chaussa che noss perdavants savevan gia. Perquai è il tema dal referat dad *André Ackermann* era stà: «Far adiever danovamain d'enconuschientschas tradiziunalas – medischina pratica da plantas en favur da la sanadad veterinaria», (*Altes Wissen neu angewandt – praktische Pflanzenmedizin in der Tiergesundheit*). Omadus referents, *Susanne Dachauer* sco er *André Ackermann* han adina puspè fatg attent en l'arena dal Plantahof fullanada che la medischina omeopatica haja cunfins e sche quella na bastia betg sche saja da clamar il veterinari. Il suentermezdi èn stads uschenumnads workshops davart dals temas sco per exempel pavlar propi biologiscamain e la qualitad da viver – per

che quella na giaja betg a perder tranter il bain puril, la lavur e la famiglia. Quella dieta saja naschida d'ina cooperaziun anteriura cun il Strickhof, ha *Peter Küchler*, directur dal Plantahof, fatg a savair en ses pled da bainvegna.

Observer e puspè observar

Cun agid da la demonstraziun da *Susanne Dachauer* cun la vatga da 14 onns Canada han las visitadras ed ils visitaders da quella dieta pudì vegnir a savair che ina da las chassas las pli impurtantas saja l'observaziun da l'animal, sajan quai il muvel grond u manidel u in utschè canarin. Meds omeopatics saja quai radund 2000, dentant ins stoppia savair quals che gidian en tge situaziun, «senza enconuschientschas na funcziuna nagut», ha ella declerà. La medischina omeopatica sa basia savens sin plantas tissientadas ed ella ha tranter autras numnà il tustgin blau e la belladonna. Observer l'animal saja fitg, fitg impurtant, surtut era cura che il muvel ruaussia. Sin tge vart che in animal schaschia, tge temperatura che las chommas hajan, sco che ils excrements e l'umidità dal nas sajan, tut quai poscian esser indiz per diagnostitgar

ina malsogna. Dentant ha *Susanne Dachauer* fatg attent las audituras ed ils auditurs en l'arena sin il Plantahof che en cas che la medischina omeopata na gidia betg saja rasschunaivel da clamar il veterinari.

Surtut sin bains purils biologics

Sco che *André Ackermann* ha orientà cun l'introducziun da ses referat saja la tendenza pli e pli da provar da guerir vatga, vadel u portg cun agid da la medischina omeopatica, «quai surtut sin ils bains purils biologics, cun agid da la medischina miaivla», ha *Ackermann* pudì constatar. El ha sutut tangà malsognas dals vadels, da la gripa enfin la sfuira, dals simptoms fin la guariziun da talas malatias sco er davart l'appetit e la vitalitad dals animals che ins possa influenzar cun agid da la medischina da plantas. Impurtant saja da vesair la malsogna ad uras, surtut sajan vadels suttaposts da daventar malsaus durant la segunda e l'otgavla emna. Sco fitg impurtant vesa *Ackermann* che ils vadels han durant ils emprims dis cul da la mamma, quel cuntegnia fitg blers anticorpuls – atgnamain quai che er ils perdavants savevan gia.



Susanne Dachauer demonstrescha sco che ins po constatar sch'i manca insatge ad in animal.

FOTO G. R. CANTIENI